



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno MCCCXVI. ad annum MCCCCXXIII.

Parisiis, 1644

Epistola II. Benedicti XIII. Psevdopapae Ad Pavlvm Lvcensivm Dynastam.
In Gregorium acriter inuehitur.

urn:nbn:de:hbz:466:1-15653

EPISTOLA II.

BENEDICTI XIII. PSEVDOPAPÆ
AD PAVLVM LVCENSIVM DYNASTAM.

In Gregorium acriter inuehitur.

*Benedictus episcopus, seruus seruorum Dei, dilecto filio nobili viro
Paulo domino Lucæ, salutem & apostolicam benedictionem.*

PROPTER nonnulla in quibusdam partibus innouata, quæ sensibus quasi palpantibus nobis innotescunt, considerato præsertim, quod cum Angelo dicto Corario, qui in hoc perniciose schismate se facit appellari Gregorium, post varios & saepe tentatos labores, non sine personarum iactura, aliquem effectum ad bonum finem ecclesiæ unitatis obtinere nequivimus, de venerabilium fratribus nostrorum consilio & frequenti eorum instantia pulsati, deliberauimus pro præsenti corporali præsentia deserere partes illas, & nos cum collegio nostro reponere in seculo. Ut igitur scias ecclesiastica negotia qualiter remaneant pro præsenti, elicere poteris ex tenore literæ quam scribimus dicto Angelo Corario sub hac forma.

*Angelo Corario, qui in hoc perniciose schismate se fecit nominari
Gregorium, pacis & unionis affectum pariter & effectum.*

Si te fateri veritatem non pigeat, præsertim cum sit notorium, celare non poteris ea quæ tuis literis intimando etiam promulgasti per orbem, ut ex utriusque cessione pax daretur ecclesiæ, & quod scriptis tuis per nos ad hoc cessionis viam offerendo dato responso, & de conventione in ciuitate Saonensi pro excusatione oblatorum hinc inde secuta concordia conuenire in statutis terminis renuisti, & quibusdam interpositis per te excusationibus friuolis, post dilationes varias a te datas, post aduentum nostrum ad hunc locum, ad quem nos traxerunt Christi caritas & feruor compassionis animarum, bona fide simili citer incidentes, non absque nostri atque nostrorum fatigatione, & graui personarum iactura, per plurimum mensium interualla cum Christianorum scandalo renuisti, cautelose per verba, &, quod referimus displicenter, dene gatis multis, etiam nonnullis per te oblatis, quæ ad execu

tionem concordatorum ad vniōnem perficiendam erant
 plurimum vtilia & opportuna : de * vberiori tēcum tra-
 ctatu super huiusmodi vniōne prosequenda omnem spem
 tollendo , nuntios nostros, eisdem prorogationem salui
 conductus & audiehtiam denegando , a tua præsentia va-
 cuos remisisti. Hæc autem libenter silentio transiremus ,
 nisi tua contumacia reciperet ex nostra taciturnitate fo-
 mentum. Postquam autem apud te passa est frequens no-
 stra instantia repulsam , propter quædam in nonnullis par-
 tibus quibusdam instigantibus innouata , absque personali
 nostro & nostrorum periculo in his partibus moram trahe-
 re non valentes , cum apud te , vt clare cernitur , profice-
 re non possumus , nolentes Deum tentare imminente pe-
 riculo, ad aliquem locum , vbi nos cum nostro collegio va-
 leamus hoc turbationis tempore reponere in seculo , de
 fratum nostrorum consilio eorumque instantia pulsati de-
 creuimus declinare. Sed ne videamur , sicut nec intendi-
 mus , aduersitate intercedente huiusmodi * persecutio-
 nem vniōnis dimittere neglectam , de dictorum fratum
 consilio deliberauimus , nuntios nostros plena potestate
 fulcitos (qui , si velles ad cor reuerti , possent ad effectum
 vniōnis & oblatorum procedere efficaciter in agendis) hic
 dimittere: impedientibus tamen ambassiatoribus carissimi
 in Christo filii nostri Caroli regis Francorum illustrissimi
 in his partibus moram trahentibus , saluus conduitus dictis
 nuntiis necessarius non potuit obtineri. Quid autem super
 hac re simus vlerius , Deo auxiliante , facturi , intendimus
 vniuersis Christi fidelibus breuiter intimare. Tu vero , o
 homo , si scintilla compassionis animarum in te viget , quæ
 secundum Deum pro bono vniōnis agenda restant , consi-
 dera , & ad ea quæ obligaris ex debito , pro Dei misericor-
 dia te dispone , resecatis carnalibus desideriis , quæ con-
 tra animas militare non cessant. Nos enim ad oblata per
 nos semper promptos reperies , præteritos defectus tuos
 & contumaciam , si bene egeris , in memoria non tenen-
 tes. Deum enim in iudicem & negotiorum notorietatem
 in testem inuocamus , quod per nos non stetit , stat , aut
 stabit , quin vera vnio inducatur. Idus Iunii , pontifica-
 tus nostri anno xiv.